

Il Grischun sa mova vinavant

Ura da dumondas dal cussegl grond

■ **(anr/fa) Uffants che han memia pauc moviment, la situaziun da las piazzas da lavur tar las guardias da cunfin u il sustegn dal chantun per infrastructures relevantas per il sistem: L'ura da dumondas ha puspè già temas multifars.** Ils Grischuns èn ils pli sportivs en tut la Svizra, quai han ins pudì leger l'onn 2008 e quest onn il mais schaner puspè. «La fin da matg dentant ha l'Uffizi federal per sport comunità sorprendentmain ch'el chalia cun il project 'Schule bewegt' a la fin da l'onn da scola 2016/17», ha constatà *Remo Cavegn* (pcd, Razén) deplorond questa decisiun, «il program che vegniva realisà en grondas parts da la Svizra aveva success, perquai è sia finiziun nunchapibla.» Il president da la regenza, *Christian Rathgeb*, ha pudì quietar.

«Program grischun pli vast ch'il svizzer»

A la dumonda davart las consequenzas finanzialas ha'l respus ch'il program naziunal «Schule bewegt» era gratuit per las classas da scola che predevan part. «Il chantun na vegn betg a cuntinuar sez cun quest program causa ch'el ha introducià gia avant otg onns in agen program d'acziun cun la medema finamira», ha ditg il cusseglier guvernativ Rathgeb, la promoziun dal moviment en las scolas saja dapi l'onn 2009 in accent dal program grischun «Schule bewegt». A quel program chantunal che saja pli vast ch'il svizzer sa partecipian tenor il cusseglier guvernativ passa 40 pertschient da las scolas grischunas. Il chantun Grischun s'haja engaschà ensemen cun la Conferenza da directurs da l'educaziun ed autras organisaziuns a Berna per ch'il cussegl federal responsabel revegnia a sia decisiun, però senza success.

Diversas dumondas per infrastructures relevantas

La segunda dumonda da Remo Cavegn aveva da far cun la lescha chantunala per promover il svilup economic: «A chaschun da la sessiun d'avust 2015 ha il parlament approvà in credit d'impegn per 80 milliuns francs limità fin l'onn 2023 per sustegnair projects per infrastructures relevantas al sistem. Èn gia tschernids projects che pon far quint cun il sustegn chantunal?» Cussegljer guvernativ *Jon Domenic Parolini* ha ditg ch'il chantun possia sustegnair projects

«sch'els rinforzan il sistem turistic regiunal u sch'els correspundan ad in basegn economic complessiv». Ils cuntegns dals projects stoppian dentant esser concrets, approvads dad investurs, vischnancas u auters participads, ha declarà Parolini e ditg che quai premettia ina preparaziun exacta che dovria bler temp. «I dat diversas dumondas per ina promoziun cun daners dal credit d'impegn, ils projects n'èn però savens anc betg concrets avunda per pudair dar immediatmain risposta positiva», ha ditg il cusseglier guvernativ.

Guardia da cunfin cun dapliras piazzas da lavur a Cuira

Brigitta Hitz-Rusch (pld, Churwalden) ha menziunà la centrala operativa cuminaivla dal corp da guardias da cunfin (CGC) e da la polizia chantunala a Cuira ch'è vegnida serrada avant dus onns. «Il commando dal CGC, regiun da cunfin III, ha uss ina nova centrala al vest da la chapitala. Co sa preschenta la situaziun qua e tge consequenzas ha già il midament dal lieu per questas piazzas da lavur a Cuira?» Il president da la regenza Rathgeb ha respus ch'il CGC disponia en la Triststrasse 3/5 d'ina centrala cun

infrastructura fitg moderna che cumpiglia il commando, il servetsch da tecnica e comunicaziun, il servetsch operativ e la centrala d'acziun. Fin uss eran quels servetschs organisads da maniera decentrala. «Avant che decider da restar a Cuira han ils responsabels dal CGC evaluà differents lieus pussaivels e tschernì alura la citad da Cuira», ha pudì constatar *Christian Rathgeb*. En connex cun las piazzas da lavur ha'l declarà ch'il CGC aveva l'onn 2007 a Cuira 27 piazzas. «La midada dal lieu per la centrala n'ha già nagina influenza sin las piazzas da lavur, uss èsi schizunt 34 piazzas qua a Cuira», ha infurmà il president da la regenza, «causa ils eveniments da l'ultim temp è il corp schizunt vegnì engondì, ina piazza dapli hai dà per exempel per il sector 'terror, migraziun' e duas piazzas en il sector tecnica e transmissiun.»



Gist cun duas dumondas è il deputà cristiandemocrat Remo Cavegn (Razén) sa drizza a la regenza.

FOTO O. ITEM